

Protocol fat bun da la radunanza cumünala dals 27 favrer 2014

Protocol no. 8 **Radunanza cumünala dals 11 december 2013, 20.00 – 22.45**

Preschaintas: 45 persunas

S-chüsà: U.D., J.C. e nos chanzlist M. F.

Il capo bivgnantescha a votantas e votants. El constata, cha la radunanza saja gnüda convocada in basa da la constituziun cumünala e dumonda sch'inchün haja da far objecziuns. Sainza chi vegnan fattas objecziuns, vegnan nominats seguaints scrutinadurs: T. P. e G. C..

1. Protocol:

Il protocol no. 7 da la radunanza dals 17 october 2013 vain prelet. Quel vain approvà cun üna pitschna correctura.

2. Orientaziun supr. investiziuns previssas pel avegnir

Il vicecapo, A. P., dà ün infuormaziun sur dal proget da la sanaziun da la chasa scoula. Id es previs da far il seguaint:

- Sanaziun energetica generala
- Fanestras e schalusias
- S-chodamaint / ventilaziun
- Isolaziun tet fatschadas da lain
- Lift
- Fanestras i'ls corridors
- Adattamaints illa chadafö ed i'l local d'urdegns
- Lavuors ill'abitaziun dal pedel
- Lavuors sün piazza sura

Il cuosts totals s'amuntan sün fr. 2'362'000.-- (2014-2016).

In schner/favrer 2014 segua ün'infuormaziun plü detagliada, illa quala gnarà lura eir orientà sur da las contribuziuns per quist proget.

Il capo, A. M., orientescha in detagl sur da las punts penduossas Sinestra-Zuort. El preschaint'ill stüdi e'l preproget e muossa via süllas variantas pussiblas.

La stima da cuosts es, tuot tenor che variantas, calculada tanter fr. 800'0000.-- fin fr. 1'100'000.--. Per quist proget nu daja davart dal Chantun (Uffizi da construcziun bassa) ingünas subvenziuns.

Il silvicultur, M. R., manaja cha sainz'ün sustegn da la regiun, saraja per Sent greiv, in vist'a a la situaziun finanziaria difficila, da pudair realisar sulet quel proget.

Implü muossa il vicecapo a man d'üna survista che per investiziuns necessarias chi füssan da realisar i'ls prossems ons.

3. Preventiv dal quint cumünal pel 2014

Il capo, ils respunsabels pels differents decasteris e'l contabel orienteschan concernent il preventiv preschantà. Plüssas remarchas e dumondas vegnan respusas e tuttas a cogniziun. Il quint da gestiun muossa pro entradas da fr. 6'285'170.-- e sortidas da fr. 6'799'260.--, ün s-chavd da fr. 514'090.--.

Ils votants vegnan orientats sur da las investiziuns previssas pel on 2014. Las investiziuns nettas importan, davo avair fat ün pitschen adattamaint aval da fr. 37'500.--, fr. 1'548'500.--.

4. **Fixaziun dal pè d'impostas 2014**

In connex cun quista tractanda tuna l'introducziun dal capo sco segua:

- Dal 2010 vaiva decis la radunanza cumünala da redüer il pè d'impostas da 120 % sün 105 % cunter la voluntà dal cussagl cumünal.
- Avant ün on ha nos cussagl proponü ed argumantà detagliadamaing a la radunanza da preventiv da dozzar darcheu il pè d'impostas sün 120 %. La radunanza vaiva decis cun 45 cunter 35 vuschs da laschar il pè sün 105 %, cunter la proposta dal cussagl cumünal.
- In vista cha'l fat, cha gnanca in 3 mais po il suveran decider democraticamaing sur da la fusiun dals 6 cumüns, chi prevecess tenor proposta, cha'l cumün fusiunà vess ün pè d'impostas be da 100 % a partir dal 2015, nu faja bier sen da müdar uoss'il pè d'impostas, però il cussagl cumünal es persvas, cha'l pè d'impostas stopcha gnir augmantà massiv in cas scha Sent nu fess part a la fusiun.
- Pel cumün da Sent esa plü attractiv cun ün pè d'impostas plü bass per intimar a persunas singulas e famiglias cun uffants da gnir e tour il domicil in nos cumün.
- Il pè d'impostas stu vess avair üna tscherta equilibranza e na be gnir müdà ingiò ed insü sporadicamaing.
- Id exista, davo avair fat sclerimaints a fuond, la pussibilità d'augmentar il pè d'impostas eir pür la fin da marz/avrigl 2014 in möd retroactiv, davo ün eventual Na a la fusiun. In vist'al preventiv ed a las investiziuns previssas e necessarias sto il pè d'impostas gnir dozzà per bainquant. Quai nun es in mincha cas na mania sco squitsch.

Il cussagl cumünal propuona da laschar il pè d'impostas sün 105 % cun la cundiziun da pudair revgnir sülla decisiun subit davo la votumaziun in cas d'ün Na a la fusiun.

La radunanza cumünala segua a la proposta dal cussagl cumünal in scrutin avert, cun 44 cunter 1 vusch.

A. Z. dumonda, scha l'agir dal cussagl cumünal es in quist cas fuormal inandret. Tenor ella vain uossa decis sur dal preventiv cumünal e quel as müda, tuot tenor che decisiun chi dà in connex culla fusiun.

Il capo manzuna cha quai saja gnü scleri giuridicamaing cul Chantun ed in quista situaziun pussibel da far.

Ch. A. F. manzuna chi detta adüna dürant l'on darcheu investiziuns inaspettadas chi han da gnir decissas in radunanza. Ed in quels cas as müda lura eir il preventiv.

Decisiun

La radunanza accepta il preventiv dal quint curraint sco eir il preventiv da las investiziuns cun vusch unanima.

5. **Varia**

1. Cronica da Sent

Sar M. P. orientescha sur dal stadi da lavur da la cronica da Sent. El ha scrit sur 500 chartas per chattar contribuziuns per quel ouvra. El apellescha a la glieud indigena da contribuir alch landervia. Implü ingrazch'el al cussagl cumünal ed als impiegats cumünals per la lavur prestada dal 2013 e giavüsch'a tuots üna bella Festa da Nadal ed ün bun on nouv.

In nom dal Cussagl cumünal ingrazch'il capo a sar M. per tuot sia lavur e grond ingaschamaint.

2. Aual Palüzot

Dal 2014 esa previss da far sclerimaints d'ingionder chi vain nanpro l'aua malnetta (chanalisaziun) chi cula giò da l'aua Palüzot. Jöri Felix manzuna cha quel problem nu saja be dals ultims ons dimpersè fingià daspö 25 ons.

Per l'actuar:

Rico Zini

Il Capo:

Albert Mayer